

E Gobierno aki tin

## Tur atencion p'e tema di abuso di menor y pesey ta bin cu meldpunt y lo aumenta castigo

segun Minister mr. Andin Bikker



E tema di abuso di menor tin tur atencion di Minister di Husticia mr. Andin Bikker. For di tempo cu e tabata den Parlamento na 2009/2010 e tema aki ta un problematica cu varios biaha a bati na porta di tanto Gobierno anterior como tambe na Parlamento. Varios comision a haci caminata di protesta sinembargo e Gobierno anterior practicamente no a haci nada riba dje.

Segun Minister Bikker, Gabinete Wever Croes cu tin apenas 1 año y cinco luna ta dunando tur atencion apesar di tur problema financiero cu a hereda.

E Gobierno aki tin diferente otro reto p.e. di pais Venezuela, pero asina mes ta sigui duna atencion n'e tema di abuso di menor. Riba e tema aki a cuminsa cana y pidi consejo y e prome paso t'e Crisis Plan Social cu a tuma di principio. Por corda na luna di november 2017 apenas un siman den Gobierno, Gabinete Wever Croes a haya su mes enfrenta cu dos crimen atroz cu ta toca muchanan menor di edad den cual a bin descubri un desastre riba tereno social.

Segun Minister Bikker, pa loke ta trata husticia, esaki t'e ultimo fase unda ta castiga e persona cu a caba cu e ambiente familiar, comunidad y e zona confortabel di e criatura.

Den e cuadro aki a haci un analisis profundo kico t'e leyman cu por cambia. E prome paso cu a tuma como Gobierno ora a confronta cu e situacion di e dos rumannan t'e caminda di crisis plan social cu ta canando aworaki. E por tin su retonan semper, pero ta dunando atencion n'esaki. Pa loke ta trata e fase hudicial a haci un analisis unda p.e. e meldpunt cu ta denCodigo Civil 2016. Den e concepto diCodigo Civil esey a tuma su tempo y no a ser decreta.

Pero awor a tuma un decision cu lo bay decreta eCodigo Civil pa 1 di juni. E meldpunt ta articulo 243 A te cu C y ta bay drenta na vigor. E meldpunt ta bay encera cu un profesional den su ambito, e constata algo e no mester tene miedo di señalá esaki. Ta bay tin un punto central p'e meldpunt caminda por meld tambe casonan di e.o. abuso di menor y e ora esey ta bay canalisa.

E di dos ta, cu den un estudio e castigonan riba e hecho castigabel na opinion di Minister di Husticia ta hopi abou. Si un persona induci un menor di edad cu regalo etc. pa haci hechonan castigabel e castigo maximo ta 4 año, pero kier redobla e castigo aki na 8 año. E castigo maximo pa zedendelict di mas pio cu por tin ta 12 año y kier bay cu esaki na 16 año.

Un otro cu ta bay cambia t'e ley di 2012. Cu eCodigo Penal nobo di 2012 a pone practicamente cu un persona e.o. esun cu haci e delito di mas pio e.o. haci abuso di un mucha menor, nan sinta 2/3 parti di nan castigo, ta bin na remarca pa haya libertad condicional.

Den esey e legislador e tempo ey a pone cu e Raad voor de Reclassering si duna un consejo cu e mester duna e persona libertad condicional su consejo ta bindend. Segun Minister Bikker, esey tambe kier cambia, pasobra si ta diferencia di opinion cu un consejo asina, un Minister di Husticia cu mester carga responsabilidad como gobernante y mester por bisa cu no ta laga e persona aki bay den libertad.

Un persona si e comete un delito asina no ta bin na remarca pa haya libertad condicional, esta libertad mas tempran.

Un otro cambio den castigo cu kier introduci castigo minimo. Como legislador representante di pueblo ta sinti cu constitucionalmente tin e mandato pa bin cu un ley asina.

Ta bay argumenta cu Raad van Advies riba e intencion cu introduci e ley aki. Pa loke t'e straf beleid, ora cu Ministerio Publico atende cu casonan di abuso di menor, cu e exigencia p'e castigo ta haltisimo.

Ta evaluando tambe e sistema manera Merca, unda ta condena un persona di un crimen di abuso di menor y e bin biba den un bario, e habitantenan mester haya notificacion di su presencia. Segun e mandatario, ta studiando riba e posibilidad ey y Reino Hulandes no tin esaki ainda y ta bay wak con huridicamente e por ta posibel.

Segun Minister Bikker personalmente, e ta un persona cu for di dia cu el a bin den gobernacion, e ta traha cu cifra.

E Gobierno anterior tabata sconde y manipula cifra y tambe medio di comunicacion cu ta sostiene e Gobierno anterior tabata campeon den sconde e cifranan ey.

Manera Minister Bikker a asumi responsabilidad, el a percura tur jaarverslag 2014 bin 'riba ser entrega na Parlamento. Awor 2017/2018 ta kedando cla y ta bay manda nan tambe pa Parlamento.

Basa riba cifra por concretisa maneho esey a haci cu a inventarisa kico t'e cifranan di januari 2019 bin 'riba y nan ta alarmante.

Cuerpo Policial diahuebs mainta a emiti un comunicado y te awor cu ta drenta mei di 2019, tin 33 sospechoso deteni pa crimen nan zedendelicten di diferente forma. Basa e cifranan te awor, e tema di abuso di menor ta keda uno alarmante.

Mester corda cu for di 2010 bin 'riba, bou di e Gobierno anterior tabata bin cu protesta, marcha y den Parlamento a reuni den diferente comision, diferente representante y diferente fundacion y 8 año largo no a haci nada. Aworaki Gabinete Wever Croes, cu tur ministerio cu tin di haber cu e tema aki ta adresando esaki cu plannan concreto y cambio den ley. E tema abuso di menor tin tur atencion di gobernantenan y mirando e cifranan e ta keda demanda atencion y no tin fondo suficiente pa atende cu e problema aki.

No obstante cu a hereda un situacion financiero cu reto hopi grandi, e tema no ta facil pasobra e tin diferente faceta cu ta cuminsa den un ambiente di proteccion.

Hopi biaha personanan cu ta comete e crimenan aki, ta wordo confia dor di e menor. Na final di dia por castiga teniendo e personanan aki cera pa bida, pero e mucha e criatura ta keda marca pa bida y esey kier evita. Segun Minister Bikker, e asunto aki ta un problema hopi delicado y ta di lamenta cu tin media di opositornan cu ta haci maluzo di e tema aki cu un fin politico. Den 8 año Gobierno anterior no a haci nada riba e tema pero awor cu nan ta den oposicion nan sa tur cos. Gobierno aki ta bin cu meldcode y tambe cambiando e ley di castigo. Esey ta cosnan concreto cu ta haci como Gobierno pa cabalmente cumpli, segun Minister di Husticia mr. Andin Bikker.